

## **Skupština Kantona Sarajevo**

Admela Hodžić, zastupnica u Skupštini Kantona Sarajevo

Sarajevo, 16.01.2024. godine

Bosna i Hercegovina  
Federacija Bosne i Hercegovine  
Kanton Sarajevo  
Skupština Kantona Sarajevo  
N/r predsjedavajućeg  
Vlada Kantona Sarajevo  
N/r premijera

### **ZASTUPNIČKA INICIJATIVA**

Na osnovu čl. 106 i 213. stav (1) Poslovnika Skupštine Kantona Sarajevo („Službene novine Kantona Sarajevo“, broj: 41/12-Drugi novi prečišćeni tekst, 15/13, 47/13, 47/15, 48/16, 9/20, 14/20, 16/22 i 17/22-Ispravka) podnijela sam inicijativu Vladi Kantona Sarajevo da se sredstva planirana u Budžetu Kantonalne uprave civilne zaštite Kantona Sarajevo za 2023. godinu, sa stavke 614300 Tekući transferi neprofitnim organizacijama UAN004 Tekući transferi vatrogasnim društvima u iznosu od 200.000 KM isplati vatrogasnim društvima sa područja Kantona Sarajevo.

U Budžetu Kantona Sarajevo za 2023. godinu su planirana gore navedena sredstva, ali do danas nisu isplaćena, pa se ova inicijativa može smatrati hitnom obzirom na današnji datum.

Na ovu inicijativu je Kantonalna uprava civilne zaštite uputila odgovor broj: 01-04-1576-1/23 od 05.01.2024. godine.

Odgovor koji mi je dostavljen odnosi se na sredstva iz prethodnih godina i nije predmet onoga što sam tražila inicijativom, te zbog toga ovaj put inicijativu upućujem Vladi i premijeru Kantona Sarajevo da riješe ovaj problem i isplate sredstva vatrogasnim društvima za svaki poziv na intervenciju u 2023. godini od strane Kantonalna uprava civilne zaštite Kantona Sarajevo, a takvih poziva za intervencije bilo je 156.

Iznos koji treba isplatiti vatrogasnim društvima za troškove svakog poziva na intervenciju od strane Kantonalne uprave civilne zaštite, može obračunati ovlaštenu sudsku vještaku ako Kantonalna uprava civilne zaštite Kantona Sarajevo nije u stanju obračunati te troškove.

## OBRAZLOŽENJE

Obzirom da Kantonalna uprava civilne zaštite Kantona Sarajevo nije do kraja budžetske 2023. godine, reagovala i isplatila Budžetom planirana sredstva vatrogasnim društvima Kantona Sarajevo, ovoga puta tražim od Vlade kantona Sarajevo i premijera da nađu način da se izmire troškovi po izvršenom poslu, a po pozivima Kantonalne uprave civilne zaštite Kantona Sarajevo.

“Općina i grad odnosno kanton su **DUŽNI** tom vatrogasnom društvu, odnosno dobrovoljnoj vatrogasnoj jedinici osigurati sredstva potrebna za realizaciju zadataka koji su utvrđeni u tom planu zaštite od požara.” (“Službene novine FBiH” broj 64/09).

Plan zaštite je donesen i nema potrebe da neko individualno donosi bilo kakve odluke mimo Zakona o zaštiti od požara i vatrogastvu (“Službene novine FBiH” broj 64/09) i Plana zaštite od požara Kantona Sarajevo.

### PLAN ZAŠTITE OD POŽARA KANTONA SARAJEVO

Broj protokola: 01-04-21378/22

#### SISTEM PRIMANJA DOJAVE O POŽARU I UKLJUČIVANJA U AKCIJU GAŠENJA POŽARA VATROGASNIH JEDINICA TE OSTALIH UČESNIKA

Kanton Sarajevo je kanton sa najvećom požarnom ugroženošću, najvećim brojem stanovnika, najvećim brojem objekata od kulturno-historijskog, te ostalih objekata drugog značaja u Bosni i Hercegovini. Iako ovaj kanton ima veliku važnost te sve predispozicije da bude zaštićen najadekvatnijim te najsavremenijim sistemima za dojavu požara, to u ovom slučaju nije u potpunosti provedeno.

Na cijeloj teritoriji Kantona Sarajevo, dojave o požarima se dobijaju uglavnom telefonskim putem na broj 123, gdje dispečer po prijemu poziva te dojave o požaru šalje u najbližu vatrogasnu jedinicu na mjesto pojave požara. Jedinice koje se šalju mogu biti profesionalne, dobrovoljne ili kombinacija jednih i drugih, u zavisnosti od tipa te vrste požara, pri dolasku na lokaciju vrši se sagledavanje nastale situacije na lokaciji, procjena situacije, zatim se pravi plan gašenja, izdaju komande za rad i komande za pomoć, ako je potrebna. U zavisnosti od veličine požara mogu se angažovati dodatne jedinice iz

rezervnog sastava ili neke druge u zavisnosti od organizacije.

Uključivanje u akciju vatrogasnih jedinica ide ovim redom:

**U I POZIVU:** dežurne ekipe ispostava PVJ; najbliža vatrogasna ispostava po pozivu o dojavi o požaru - dolazi na intervenciju u roku od 15 minuta od najave požara sa 18 vatrogasaca PVJ, a u slučaju požara šuma i 10 pripadnika Sarajevo-šuma, a ostalim vatrogasnim jedinicama javlja se za pripravnost;

**U II POZIVU:** uključuju se dobrovoljne vatrogasne jedinice (prema blizini lokacije DVD u odnosu na mjesto požara). Ove vatrogasne jedinice nastupaju sa najmanje 12 vatrogasaca i odgovarajućom opremom, koji se odazivaju u roku od pola sata;

**U III POZIVU:** preduzetne profesionalne i dobrovoljne vatrogasne jedinice, prema blizini lokacije u odnosu na požar, kao i vatrogasci PVJ koji su u datom momentu slobodni, i ostali članovi dobrovoljnih vatrogasnih jedinica da se odazovu u roku od 45 minuta od najave požara na mjesto gašenja požara.

U odgovoru je obrazlagana dodjela sredstava vatrogasnim društvima iz 2021. godine, što nije bio predmet moje inicijative. U mojoj inicijativi je traženo da Kantonalna uprava civilne zaštite Kantona Sarajevo dodijeli sredstva vatrogasnim društvima koja su predviđena u Budžetu Kantona Sarajevo za 2023. godinu. Postavlja se pitanje da li Uprava postupa u skladu sa odlukama Vlade i Skupštine Kantona Sarajevo ili postupa protiv donesenih odluka?

U odgovoru je navedeno da je Federalna uprava civilne zaštite tumačila član 84. Zakona o zaštiti od požara i vatrogastvu i da je napisala da se sredstva mogu dodjeljivati vatrogasnim društvima samo putem projekata. Međutim Federalna uprava civilne zaštite ne može tumačiti Zakon, jer zakon može tumačiti samo organ koji je taj Zakon donio, a to je Parlament Federacije BiH.

Kantonalna uprava civilne zaštite Kantona Sarajevo je u 156 navrata pozivala vatrogasna društva na intervencije na koje su se društva odazvala i učestvovala u istim. Međutim, Kantonalna uprava civilne zaštite Kantona Sarajevo do danas nije isplatila već odobrena

sredstva Budžetom Kantona Sarajevo, tako da možemo zaključiti da Skupština Kantona Sarajevo, to jest mi zastupnici, kršimo čl. 84. i 135. tačka 8) Zakona o zaštiti od požara i vatrogastvu ("Službene novine FBiH" broj 64/09) koji glase:

#### **Član 84.**

Kanton, općine, odnosno grad i pravna lica i druge institucije mogu materijalno i na drugi način pomagati dobrovoljno vatrogasno društvo u obavljanju poslova iz njihove nadležnosti koji su utvrđeni u čl. 81. i 82. ovog zakona.

**Ako su planom zaštite od požara općine, odnosno grada ili kantona utvrđene određene obaveze za dobrovoljna vatrogasna društva, odnosno za dobrovoljne vatrogasne jedinice u gašenju požara i spašavanju ljudi i materijalnih dobara ugroženih požarom ili eksplozijom, općina i grad odnosno kanton su DUŽNI tom vatrogasnom društvu, odnosno dobrovoljnoj vatrogasnoj jedinici osigurati sredstva potrebna za realizaciju zadataka koji su utvrđeni u tom planu zaštite od požara.**

#### **Član 135.**

##### **Kanton finansira:**

**8) pružanje pomoći dobrovoljnim vatrogasnim društvima osnovanim na području kantona za finansiranje određenih poslova iz njihove nadležnosti od značaja za zaštitu od požara i vatrogastvo, a posebno za finansiranje dobrovoljnih vatrogasnih jedinica osnovanih u tim društvima.**

U Zakonu o izvršenju Budžeta Kantona Sarajevo u članu 22. stav (2) je regulisano je da se za pitanja kojim je regulisano finansiranje udruženja posebnim zakonom ne primjenjuje dodjela Javnim pozivom.

U odgovoru na moju inicijativu je navedeno da je upućena obavijest da Općine kojima su dodjeljena sredstva za vatrogasna društva, izvrše povrat neutrošenih sredstava što su iste i učinile. Poslije toga je direktor formirao komisiju u mjesecu aprilu 2023. godine za provjeru ispravnosti utrošenih sredstava, ali do danas ona nije donijela nikakvu ocjenu iako je od formiranja komisije proteklo 9 mjeseci. Prema odgovoru, Općina Novo Sarajevo je

vratila kompletan iznos, a Općina Novi Grad nije uopće prihvatila sredstva, pa se postavlja pitanje zašto tim društvima nisu dodjeljena sredstva, jer oni ni po čemu nisu sporni.

Iz dobrovoljnih vatrogasnih društava tvrde da nije tačna konstatacija da vatrogasna društva nisu imala projekte prema kojima su pravdala sredstva, čak su neka vatrogasna društva angažovala i firme za izradu projekata (Vatrogasno društvo "Vogošća"), te su imali i dodatne troškove.

Suma od 200.000 KM je minimalna jer time dobijamo 200 dobrovoljnih vatrogasaca sa svim vozilima i opremom, pa tako dođemo do zaključka da jedan dobrovoljni vatrogasac košta 1.000 KM za godinu dana što je posebno povoljno za Kanton Sarajevo.

Ukoliko im se ne isplate navedena sredstva postoji opasnost da vatrogasna društva moraju prestati sa svojim aktivnostima zbog nedostatka finansijskih sredstava, što bi bilo pogubno po građane Kantona.

Također, ukoliko se ne uplate sredstva za izmirenje troškova koje su vatrogasna društva imala u 2023. godini, postaje bespredmetno to što Vlada i Skupština planira ta sredstva u Budžetu Kantona Sarajevo, jer Kantonalna uprava civilne zaštite ne isplaćuje Budžetom planirana sredstva koja su odobrena od strane Skupštine Kantona Sarajevo.

**Zbog svega navedenog ostajem pri svojoj inicijativi i tražim da Vlada Kantona Sarajevo nađe način i vatrogasnim društvima Kantona Sarajevo isplati sredstva planirana Budžetom Kantona Sarajevo, odnosno obračuna troškove koji su stvarni i realni a koji su nastali tokom 2023. godine prilikom 156 poziva na intervencije od strane Kantonalne uprave civilne zaštite Kantona Sarajevo.**

Podatke koje sam koristila u svojoj inicijativi sam dobila od Vatrogasnog saveza Kantona Sarajevo i svih 8 vatrogasnih društava sa područja Kantona Sarajevo.

Admela Hodžić

Samostalna zastupnica u Skupštini Kantona Sarajevo